

Inatsisartut suleriaasianni § 37, imm. 1 naapertorlugu Naalakkersuisunut apeqquut imaattoq matumuuna saqqummiuppara:

Naalakkersuisunut apeqquutit:

1. Naalakkersuisut Sisimiuni arsaattarfinnut tunngatillugu pissutsit maanna atuuttut ilisimavaat, matumani illoqarfik maannakkut naammaginartumik tamakkiisumillu atorneqarsinnaasumik arsaattarfimmik peqannginnera ilanngullugu?
2. Naalakkersuisut imaluunniit Naalakkersuisoqarfik attuumassuteqartoq 2025-miit Sisimiuni arsaattarfiit pillugit borgmesterimik, Qeqqata Kommunianik imaluunniit kommunimi oqartussanik allanik oqaloqateqarsimappat?
 - a. Aappiuppat, taava oqaloqatigiinnerit suut pillugit ingerlanneqarsimappat, aammalu qanoq tigussaasunik inerneqarsimappat?
3. Naalakkersuisut Qeqqata Kommunia Sisimiuni arsaattarfimmik nutaamik pilersitsinissamik pilersaarutai, matumani kommunip 20 mio. koruuninik immikkoortitsinera ilanngullugu, ilisimavaat, aammalu Naalakkersuisut suliniutip maanna killiffia qanoq nalilerpaat?
4. Naalakkersuisut Kalaallit Arsaattartut Kattuffiat (KAK), Kalaallit Nunaanni Timersoqatigiit Kattuffiat (GIF) imaluunniit timersornermut kattuffiit allat attuumassuteqartut Sisimiuni arsaannermut atugassarititaasut pillugit aammalu arsaattarfimmik nutaamik imaluunniit matoqqasumik pilersitsinissamut periarfissat pillugit oqaloqatiginikuuat?
5. Naalakkersuisut Sisimiuni arsaattarfinnik naammaginartunik pilersitsinermut imaluunniit iluarsartuusseqqinnermut peqataarusuppat, assersuutigalugu aningaasaleeqataassuteqarnikkut, aningaasaateqarfinnit imaluunniit aningaasaliissutinut periarfissatigut, teknikkikkut ikiuunnikkut imaluunniit Namminersorlutik Oqartussat, Qeqqata Kommuniata timersornermullu kattuffiit akornanni suleqatigiinnikkut?
6. Sisimiup angissusaa eqqarsaatigalugu illoqarfik aaqqissuussamik arsaannermut aammalu tamanut timersornermut naammaginartunik atugassaqaqtitsinnginnera, pingaartumik meeqqat inuusuttullu kiisalu peqatigiiffilerinnermut, timersornikkut, inooqatigiinnikkut peqqissutsikkullu qanoq kinguneqarsinnaasoq Naalakkersuisut qanoq nalilerpaat?
7. Sisimiut piffissamut naleqquttunik arsaattarfinnik peqalernissaa anguniarlugu Naalakkersuisut qanoq tigussaasunik suliniuteqassamaapat, aammalu Naalakkersuisut peqataanissaannut piffissaliussamik aalajangersimasumik Naalakkersuisut saqqummiussisinnaappat?

(Inatsisartunut ilaasortaq Mette Arge-Hammeken, Naleraq)

Tunngavilersuut:

Sisimiut Kalaallit Nunaanni illoqarfiit annersaasa tulleraat, timersornikkullu peqatigiiffilerinikkullu uummaarissumik ileqqutoqqanillu pisuumik ingerlatsiffiuvoq. Taamaattumik pingaaruteqarpoq meeqqat, inuusuttut inersimasullu timersornissamut, ilaatigut arsaannermut aammalu timersuutit allat, pitsaasunik ullutsinnullu naleqquttunik periarfissaqarnissaannut.

Qeqqata Kommuniani Kommunalbestyrelsip 30. april 2026 Sisimiuni arsaattarfimmik matoqqasumik pilersitsinissamik siunnersuut suliaraa. Kommunip paasissutissiissutigaa arsaattarfimmik nutaamik sanaartornissamut 20 mio. koruunit immikkoortinneqarsimasut, aammalu 2025-mi aasakkut immikkut ilisimasallit arsaattarfissap sumi inissinneqarsinnaaneranut periarfissanik misissuisimasut. Taamaattorli kommunip aamma oqaatigaa suliniut suli inaarutaasumik aalajangersarneqarsimanngitsoq.

Aammattaaq kommunip paasissutissiissutigaa Kalaallit Arsaattartut Kattuffiata (KAK) 2025-mi kommunit saaffigisimagai, arsaattarfiit ivigaasaaqqanik qallikkat qulaannut Airdome-nik pilersitsinissamut periarfissat pillugit. Tamatuma kingorna Qeqqata Kommuniani borgmesteri KAK-mik suliniut pillugu oqaloqateqarsimavoq. Kommunip paasissutissiissutigaa KAK naapertorlugu arsaattarfiup ivigaasaaqqanik qallikkap qulaanut Airdome-p kisimi pilersinnissaa missiliorlugu 20-25 mio. koruuninik akeqarsinnaasoq.

Taamaattumik suliaq arsaattarfimmik nutaamik pisariaqartitsineq imaluunniit kissaateqarneq kisiat pineqanngilaq, aammali suliniutip qanoq piviusunngortinneqarsinnaanera, aningaasalersorneqarsinnaanera aammalu kommunip, Naalakkersuisut timersornermilu kattuffiit suleqatigiinnerisigut qanoq ingerlanneqarsinnaanera pineqarpoq. Tamanna tunngavigalugu Naalakkersuisut suliami qanoq inissisimanissartik takorloorneraat aammalu Sisimiuni arsaannermut tamanut timersornermullu pitsaasunik, patajaatsunik siunissamullu atasinnaasunik atugassaqaqtitsilernissamut Naalakkersuisut qanoq tigussaasumik peqataasinnaanersut paaserusunneqarpoq.

Apeqqutigineqartut ullut suliffiusut qulit (10) iluanni allakkatigut akineqareersimanissaat piumasarineqarpoq. Oqaatsinik nutserisimanermi paatsuungasoqassatillugu kalaallisut allassimasoq aallaavigineqassaaq.